



গাছ কেটো না

পড়ার আগে ভাবো :

গাছ আমাদের উপকারী বন্ধু। গাছ না থাকলে আমাদের পক্ষে বেঁচে থাকাও যে সম্ভব নয়, তা তোমরা নিশ্চয়ই জানো। আমাদের শপথ করা উচিত আর কখনো গাছ কাটবো না।



নীরেন্দ্রনাথ চক্রবর্তী



কাল যে ছিল গাছের সারি
আজ পড়েছে কাটা,
রাস্তা দিয়ে তাই ত ভারী
শক্ত হল হাঁটা।

রোদ্দুরে গা যাচ্ছে পুড়ে
এখন রাস্তাঘাটে,
বাইরে গেলেই ভর দুপুরে
মাথার চাঁদি ফাটে।

গাছগুলো সব দাম না-নিয়ে
ফুল দেয় আর ফল দেয়।

আকাশ জুড়ে মেঘ জমিয়ে
বৃষ্টি নামায়, জল দেয় ।
ধস্তে দেয় না মৃত্তিকাকে
শেকড়গুলোকে কাটলে কি হয়,
তাও তো দেখছ তুমি,
গাঁ গঞ্জ আর জীবন্ত নয়,
শুকনো মরুভূমি ।
হারিয়ে গেছে মাথার উপর
গাছের সবুজ পাতা ।
জ্বলছে বাজার রাস্তা ও ঘর
এই নাকি কলকাতা !
তাই ত বলি, গাছ কেটোনা,
গাছকে রাখো ধরে,
তা নইলে ভাই লক্ষ্মীসোনা
বাঁচবে কেমন করে ?

জেনে রাখো :

টাদি — ব্রহ্মতালু

মৃত্তিকা — মাটি

গঞ্জ — বাজার / বাণিজ্যের স্থান

কবি পরিচয় :

কবি নীরেন্দ্রনাথ চক্রবর্তী ১৯১৪ খ্রিস্টাব্দের ১৯ শে অক্টোবর কলকাতায় জন্ম গ্রহণ করেন। একসময় ছোটোদের পাক্ষিক 'আনন্দমেলা'র সম্পাদক ছিলেন। তাঁর কাব্য গ্রন্থগুলোর মধ্যে বিশেষ উল্লেখযোগ্য 'উলঙ্গ রাজা', 'নীলনির্জন', 'কলকাতার যীশু' প্রভৃতি। ১৯৭৪ খ্রিস্টাব্দে তিনি 'উলঙ্গ রাজা', কবিতাটির জন্য 'আকাদেমি পুরস্কার' পান। তাঁর সংকলিত 'কবিতা গুচ্ছ' থেকে আলোচ্য কবিতাটি নেওয়া হয়েছে।

কাব্য পরিচয় :

পথের দুপাশে সবুজ গাছের সারি। এই ছায়া ঘেরা পথে গ্রীষ্মের দুপুরে কবির আরামের পথ চলা। হঠাৎ গাছগুলি কেটে ফেলায় পথ চলার কষ্ট কবি মর্মে মর্মে অনুভব করেছেন। একটি গাছ ফুল দেয়, ফল দেয়, ছায়া দেয়, আকাশ থেকে বৃষ্টি নামায় আবার শিকড় দিয়ে মাটিকে বেঁধে রাখে। বাতাসকে দূষণমুক্ত করে। গাছ না থাকলে সব মরুভূমি হয়ে যাবে, কেউই বেঁচে থাকবে না। তাই এই কবিতার মাধ্যমে কবি সবাইকে অনুরোধ করেছেন কেউ যেন গাছ না কাটে।

পাঠবোধ

১. ঠিক উত্তর বেছে লেখো

“কাল যে ছিল..... সারি,	(নদীর / গাছের)
আজ পড়েছে..... ,	(ফুল / কাটা)
রাস্তা দিয়ে তাই ত	(হালকা / ভারী)
..... হল হাঁটা।”	(সরল / শক্ত)

অতি সংক্ষেপে লেখো :

২. রাস্তা দিয়ে হাঁটা যাচ্ছে না কেন ?

3. ভর দুপুরে বাইরে গেলে মাথার চাঁদি ফাটে কেন ?
4. গাছ আমাদের কী দেয় ?
5. গাছ কাকে শক্ত করে বাঁধে ?
6. গাঁ গঞ্জ এখন কেন শুকনো মরুভূমির মতো লাগে ?
7. মাথার উপর থেকে কী হারিয়ে গেছে ?

সংক্ষেপে লেখো :

8. রোদে গা পুড়ে যায় কেন ?
9. গাছ কীভাবে আমাদের জল দেয় ?
10. গাছগুলোকে কাটলে গ্রামের অবস্থা কেমন হয় ?

বিস্তারিত ভাবে উত্তর দাও :

11. কবিতাটির মূল ভাব নিজের ভাষায় লেখো ।
12. কবিতাটি অনুসরণে গাছের উপকারিতা কী তা বুঝিয়ে লেখো ।
13. কবি গাছ কাটতে নিষেধ করেছেন কেন ?

14. দুটি করে প্রতিশব্দ লেখো :

আকাশ		
গাছ		
জল		

15. বিপরীত অর্থের শব্দ লেখো :

শব্দ — কাল — জীবন্ত —
শুকনো — বহিরে —

16. পদ পরিবর্তন করো :

জল — বাজার —
গাছ — গা —

17. অনুচ্ছেদ লেখো :

যদি পৃথিবীতে একটাও গাছ না থাকে বা গাছের সংখ্যা অতিমাত্রায় কমে যায় তাহলে কী হতে পারে ? পাঁচটি বাক্যে লেখো ।

করতে পারো :

ছুটির দিনে তোমরা বন্ধুরা মিলে শিক্ষকের সঙ্গে আলোচনা করে স্কুল বা পাড়ায় সুবিধা মতো যায়গায় গাছ লাগাও । সেগুলির যত্ন করা ও রক্ষা করার চেষ্টা করো ।